

四庫全書

史部

欽定四庫全書

異域錄卷下

覺羅圖理琛撰

自雅班沁捨舟俱乘騎陸行此間道路甚泥濘一
日止可行三十里許地勢漸下皆林藪越九宿于
十一日至費耶爾和土爾斯科地方此處俄羅斯
謂其國之內地愈加欽敬管柏興官排列旂幟兵
丁鼓吹而迎其護從官兵按隊層列負鎗持刃送

至館驛安置此處一帶山色奇秀室宇清潔土拉
河環抱舟楫往來宛如江南應接不暇忘異鄉行
路之崎嶇也

費耶爾和土爾斯科城

在鴉班沁之西北其間四百餘里無城郭沿途皆
山岡多林藪惟有杉松馬尾松楊樺地甚泥
濘有小柏興四五處土拉河來自西北流過費
耶爾和土爾斯科城之西面向東南而流河之

東岸石山上下及河之兩岸有柏興廬舍居七百餘戶俱俄羅斯天主堂五座有市廛設管轄柏興頭目一員駐兵三百名

候辦供給止二宿于十四日起程路甚泥濘十八日過費耶爾和土爾斯科佛落克嶺其嶺峰巒競秀泉脈爭流夾路野花若張錦綺羅極高之處亦泥濘有水

費耶爾和土爾斯科佛落克嶺

在費耶爾和土爾斯科城之西北其間二百餘里山不甚大沿途皆林藪有馬尾松果松杉松楊桦櫻莫刺玫山巔嶺上隨處流泉地甚泥濘上嶺五里許下嶺十里餘自嶺東流出者謂之土拉河嶺西流出者謂之托波兒河俱向東南流過圖敏地方土拉河歸入托波兒河復向東北流至托波兒相對地方歸入厄爾齊斯河又自山陰流出者謂之喀穆河其大似色楞格河

水色赤溜急自東北向西南而流至喀山相對
地方歸入佛兒格河其嶺之西北有山名曰帕
付林斯科時出諸山土人云冬夏積雪不消人
不能至

又越七宿于二十五日至宿里喀穆斯科地方沿
途皆山林甚泥濘大雪連朝林木巖壑一日皚然
瓊瑤璀璨光輝奪目真奇觀也自此由喀穆河水
路舟行正在料理船隻于二十七日起又大雪三

日河內流漸俄羅斯官來稟曰水路已不能行只得候地凍由陸路方可行走我等向護送官博爾果付泥克催促即由陸路起行博爾果付泥克曰其間途中泥濘浮面雖稍凍下面猶陷馬蹄易于損壞雖強為起程不能出一百里倘若阻滯反覺艱難斷不可行若稍可行走我何敢留天使在此居住只得暫候幾日因此候凍住索里喀穆斯科地方至九月盡間遍地凍結撥給馬匹拖床于十

月初二日自索里喀穆斯科地方起程

索里喀穆斯科

在費耶爾和土爾斯科佛落克嶺之西南其間
二百餘里沿途山不甚大地勢漸下俱林藪有
杉松馬尾松楊樺地甚泥濘喀穆河于索里喀
穆斯科之北二十里外來自東北向西南而流
有烏索兒科之小河來自東北由栢興中流出
向西歸入喀穆河居五百餘戶皆俄羅斯天主

堂六座有市廛設管轄柏興頭目一員駐兵三百名柏興之西北有鹽場場內有方木井四十餘處咸取井水煎鹽其隣近之小柏興亦皆煎鹽莫斯科窪城等處俱食此地鹽

越三宿于初五日至改郭羅多地方管柏興官遠出迎接治館驛安置

改郭羅多

在索里喀穆斯科之西北其間四百餘里喀穆

河來自西北遶過改郭羅多向東南而流沿途
皆山岡林藪有杉松馬尾松楊桦小柏興六七
處俄羅斯與一種別爾馬羈之人雜處柏興之
附近皆田畝居二百餘戶皆俄羅斯有天主堂
二座設管轄站頭目一員無兵從此處向西北
行通莫斯科窪城大路向西南行通喀山大路
自托波兒至此處有二千二百餘里從此至莫
斯科窪城亦有二千二百餘里

別爾馬羈之人貌類俄羅斯言語不同其言語
俄羅斯亦不解俱在喀穆河之兩岸居住詢其
來歷原係別一部落歸附俄羅斯有年

越四宿至索羅博達地方皆林數河岸之上有廬
舍俄羅斯並攜來式費耶忒國人五千餘戶雜處
又行一日至黑林諾付地方管柏興官排列旂幟
兵丁迎接請至伊家款宴候辦供給止二宿

黑林諾付

在改郭羅多之西南其間四百餘里費牙忒喀
河其大似色楞格河自費耶爾和土爾斯科佛
落克嶺陰發源來自東北遠過黑林諾付向西
南而流歸入喀穆河沿途皆山岡地勢漸下隨
處皆有小柏興甚稠密田畝亦多遙望林木蒼
然居千餘戶皆俄羅斯有市廛磚造天主堂七
座大木營治天主堂五座設管轄柏興頭目一
員駐兵三百名

產大青兔

番名博羅托賴

及獺

以上俱係西畢爾斯科道所屬地方乃噶噶林

馬提飛費多爾委翅統轄

十月十五日起程地勢漸下越六宿于二十一日
至喀山地方佛爾格河環其右潔治館驛安置夜
靜登樓遠眺見高峴月出萬象澄澈河水連漪一
碧無際遙憶鄉井心神恍然

喀山

在黑林諾付之西南其間五百餘里佛免格河
其大似鄂布河來自西北至喀山城之西南五
里外向東南而流喀穆河來自東北於喀山之
東南六十里外歸入佛免格河沿途皆山岡地
勢漸下多林藪有杉松馬尾松楊樺椴柞榆柳
波羅荆條有小柏興二十餘處俄羅斯與塔塔
拉並一種車爾米斯人雜處其柏興附近俱有
田畝喀山左近地勢平坦林木遼遠田畝甚多

其喀山係排置大木為城有八門一面二里餘
週圍八里餘有郭郭外環城俱以木為鹿角安
置城內有市廛磚造天主堂五座大木營治廟
三座居五千餘戶皆用大木營治樓房廬舍有
俄羅斯與塔塔拉並車爾米斯及土爾扈特等
人居住設立管理喀山斯科道總管顧比爾那
托爾官名費多爾薩馬落委翅人名統轄有小頭目
十餘員駐兵二千餘名具生計牲畜等項與托

波兒同食方木井水有稻稷大麥小麥蕎麥油
麥菰豆蘋果沙果檳子松子榛子核桃櫻菓刺
玫都克什乏乏哈楂梨厄衣克特克枸奶子蜂
蜜水族有鮑魚白魚魴魚鯉魚鯽魚鮎魚鴨嘴
魚四帖黑烈帖魚

其車爾米斯之人貌類塔塔拉皆削髮言語殊
異亦係別一部落原在喀山阿斯塔爾漢等處
居住其後俄羅斯侵佔諸處將伊等散處於喀

山左近地方併入俄羅斯國有年

俄羅斯國法律凡叛逆犯上者將身肢解為四
段遇敵敗北者斬其刼奪並路截傷人或殺人
者俱斬其互相鬪毆殺人者抵償持刃殺人者
抵償傷人者斷手其偷盜倉庫之官物者視其
贓之多寡有剗耳翼者有重責以火烤而發遣
者其私鑄錢者將銅鎔化灌其口內以殺之其
私賣烟酒者重責籍其家發遣其因通姦殺死

本夫者將婦人之身體埋於地內獨露其首以殺之姦夫懸於樹上以殺之其犯通姦之罪者將婦人重責交還本夫不准離異將姦夫重責復按其罪收贖入官其幼童與女子通姦者俱重責配為夫婦

在此處候辦供給止八宿於三十日起程途中越三宿初三日至西穆必爾斯科地方

西穆必爾斯科

在喀山之正南相去三百餘里佛爾格河來自東北繞城之南面向西南而流沿途地勢平坦俱係曠野無林木田畝甚多有小柏興十餘處俄羅斯與中爾米斯並塔塔拉人雜處西穆必爾斯科有城郭係大木營造小於喀山城皆損壞有八門環城俱以木為鹿角安置城之內外及河岸居十餘戶皆俄羅斯有市廛天主堂四座設管轄城郭頭目一員駐兵五百名

候辦驛馬供給止五宿初九日起程途中經賽斯
蘭十二日晚偶遇狂風大作風雪交加撲面不能
前進住佛爾格河岸又越四宿于十六日至俄羅
斯國界之薩拉托付地方

薩拉托付

在西穆必爾斯科之西南相去五百餘里俄羅
斯與土爾扈特兩國接壤之處佛爾格河來自
東北繞薩拉托付之南向南而流水濁溜緩此

河俄羅斯國人名曰佛爾格河土爾扈特國之
人名曰厄濟兒河沿途皆平坦地方間有山岡
地勢漸下林木稀少有楊桦椴柞榆波羅等樹
田畝甚多有小柏興二十餘處俄羅斯與車爾
米斯並塔塔拉人雜處河之北岸有廬舍居五
百餘戶俱俄羅斯其柏興之東北兩面皆山不
甚大南面有佛爾格河環流東西北三面俱掘
濠其外安置鹿角河內有寬一丈長七丈餘船

四五隻寬二丈長十丈餘船壹隻小舟艇五十餘隻有市廛天主堂六座設管轄柏興頭目一員駐兵二百名

有床桌櫈車拖床

種大麥小麥蕎麥油麥豌豆麻

有稻稷米因問及二米出產之處俄羅斯言稷米乃本地所產稻米本地不出係沙漳汗所屬科索里巴什地方所產皆沙漳汗國阿爾米牙

那之貨通人挽運販賣有兩種蘿蔔白菜葱蒜

王瓜倭瓜

畜馬牛羊猪鵝鴨雞犬猫

有一種雞身大似鵝脚高尾短有蒼黑色而花紋者亦有白色而青斑者俱雄雞之冠不時變幻各色人稍侵之即鳴而舒翼毛羽豎立冠便下垂比戶畜之甚多俄羅斯言此聶穆沁地方所產之雞後得種於聶穆沁今蕃息甚多俄羅斯

斯人又呼式費耶忒國為聶穆沁河內有鱖魚
鮎魚鰭魚白魚鯁子魚魴魚鯉魚鯽魚禪魚
鴨嘴魚鱣魚四帖里烈帖魚

二月下旬雪已消盡佛爾格河水解釋於三月
上旬草即萌木葉發

俄羅斯國地方寒而濕雨雪勤多陰少晴幅幘遼
濶林木蕃多人烟稀少其國俗貴賤難辨其下
人每見尊長皆免冠立地而叩尊長不免冠凡

男子或過於途次及他處每遇皆互相免冠立地而叩男子與婦人相遇男子免冠婦人立地而叩其俗以去髭髯為姣好髮卷者為美觀婚嫁用媒妁聘娶之日往叩天主堂誦經畢方合殮殯殮有棺俱送至廟內葬埋起墳墓無喪禮喜飲酒親友至必出酒以敬之不知茶服殯褐芋布以麥麪做餅食亦食各項肉魚不食飯每食用匙並小叉無箸務農者少藉貿易資生者

多知種而不知耘不知牛耕沿河近水居住者
多喜浴善酒用瓜種大小銀錢有值三文十文
五十文百文之銀錢亦有紅銅大錢與小銀錢
通用以十六寸為一尺十二兩為一觔千步為
一里人性矜誇貪得平居和睦喜詆諧少爭鬪
好詞訟每逢吉日男子相聚會飲醉則歌詠跳
舞婦女不知規避爭相粧飾各處遊嬉隊行歌
與途問及節氣彼云無厯俱與伊俄羅斯佛經

內選擇日期不知朔望或二十九日三十日三十一日不等為一月以十二月為一歲知有四季於康熙五十一年十二月十六日係伊國冬季大齋完日為歲初二十一日浴佛於五十二年十一月二十七日為歲初十二月初三日浴佛尚浮屠齋戒之日多自伊國王以至庶民歸入俄羅斯教之各種人及男婦童稚每年按四季大齋四次每季或四十日三十餘日不等平

素皆按七齋戒七日內戒肉食二日觀其國俗
用度尚儉居處汙濁最尊法令極厭兵戎俄羅
斯國向無汗號原避處於西北近海之計由地
方而地界甚狹傳至衣宛窪西里委翅名人之時
其族內互相不睦以致於亂衣宛窪西里委翅
力甚微弱乃求助於式費耶忒國王而式費耶
忒國王許助衣宛窪西里委翅兵八千並糧餉
欲取俄羅斯之那爾瓦城衣宛窪西里委翅從

其言將那爾瓦城歸於式費耶忒國因假此兵力衣宛窪西里委翅征收其族類而自號為汗焉迄今三百餘年從此強盛將喀山並托波兒等處地方俱已征獲其後又侵佔伊聶謝並厄爾口泥布楚等地方國勢愈大俄羅斯國現在國王察罕汗之名曰撒忒爾阿里克謝耶委翅年四十一歲歷事二十八載所居之城名曰莫斯科窪因遣使索取歸於式費耶忒國之那爾

瓦城而式費耶忒國王不許遂成仇敵已五十年式費耶忒國王名曰喀魯祿什年三十三歲所居之城名曰四條科爾那初戰敗俄羅斯國之兵大加殺擄後再戰為俄羅斯察罕汗所敗傷人甚多失城數處以致危急逃往圖里耶斯科國空科爾汗所屬鄂車科付之小城居住已經八年又有名曰米爾奇里斯一小國王先在沙漳汗左近居住係別一部落因協助察罕汗

與式費耶忒國交戰被擒察罕汗歸其被擄之
式費耶忒國人贖還在途中病故

俄羅斯國之西北諸國名目

圖里耶斯科

式費耶忒

博爾托噶里牙

付蘭楚斯

雅爾馬尼牙

宜大里牙

宜斯巴尼牙

狄音

和爾斯提音

布魯斯奇

博爾斯奇

別穆斯林奇

賽薩林穆斯林奇

昂假爾斯奇

賀蘭斯奇

博玻林穆斯林奇

肆班斯奇

南面所有諸國部落名目

土爾扈特

哈拉哈兒叭

哈薩克

策旺拉布坦

布魯特

莽武特

布哈爾

哈薩兒巴什

伊爾欽

哈什哈兒

庫策

阿克蘇

吐爾們

沙漳

跟隨俄羅斯官博爾果付泥克四鐵班訥委翅差
俄羅斯國之通事并管兵頭目馳告阿玉奇汗言
天朝使臣已至我界薩拉托付地方駐劄速派官兵預
備驛馬供給前來迎接時雪甚大衆不能前進遂

駐劄於薩拉托付地方在彼候阿玉奇汗迎接之
間乃屬冬令諸人輪流宴飲或會同射的或於河
岸騎射捕魚以為娛其俄羅斯官所差通事等至
土爾扈特國阿玉奇汗聞此信甚喜傳集其部落
修治氊帳衣服預備供給俱各停妥候青草發後
於五十三年四月初五日土爾扈特國阿玉奇汗
差伊部下台吉魏正等恭請

至聖大皇帝萬安并問天使無恙於五月初六日渡厄

濟兒河因馬駝未齊候駐一日於十八日貝子阿
拉布珠兒之父那哂爾麻木差伊所屬之寨桑趙
忒霸台吉諾爾木爾金於我四人處各送馬二匹
舒哥等四人處各送馬一匹曰我頭目言我子阿
拉布珠兒蒙

至聖大皇帝沛施恩澤生計饒裕不勝感戴欲往叩謝
如天大皇帝闕下並仰瞻

金顏奈路途迢遠苦不能至今聞得

大皇帝頒發諭旨欽命天使至此不勝榮幸特差我等
前來恭請

至聖大皇帝萬安問天使大人無恙並送馬匹我等言
爾那哂爾麻木感

大皇帝深恩特遣爾等前來恭請

大皇帝萬安送我等馬匹甚合禮儀但我等係特差往
爾汗處欽奉

諭旨今尚在途中爾汗又預備馬匹乘騎此地並無用

馬處爾那咂爾麻木深感

大皇帝厚澤遣爾等前來請安送馬之處我等回日奏聞

大皇帝可也將所送馬匹發還二十日起程行十日於六月初一日至土爾扈特國阿玉奇汗駐劄之馬駕托海切近地方阿玉奇汗遣伊部下台吉並番僧等迎導至宿處安置至沿途阿玉奇汗部下台吉並番僧及歸入阿玉奇汗之莽武特頭目各

率所屬人等陳設筵宴排列牲畜遠來迎接以及
馬前跪獻食物者甚衆皆不勝欽敬至下午阿玉
奇汗差伊特近番僧格瓦等前來稟曰明朝吉日
我汗恭請

至聖大皇帝

諭旨並會天使次早初二日捧

旨前往土爾扈特國台吉番僧排列前導俄羅斯國官
兵隨後擁護至阿玉奇汗幄帳切近下馬交遞

諭旨阿玉奇汗跪接北向恭請

東土大皇帝萬安畢我等宣

旨曰

大皇帝諭旨問汗無恙欲將爾姪貝子阿拉布珠兒發
往使爾團聚詢問俄羅斯國商人科密薩爾又將阿
拉布珠兒之四人調來正在料理恰合朕意爾竭誠
特遣使薩穆坦等請安朝覲進貢前來朕甚嘉念於
是特選厄魯特之舒哥米斯及我等前來

頒發諭旨恩賞阿玉奇汗不勝感謝讓我等坐其右作
樂筵宴阿玉奇汗恭請

大皇帝萬壽我等答曰我

大皇帝甲午年誕生今年六十一歲阿玉奇汗又問

皇子幾位我等答曰現今已封親王郡王貝勒貝子
及常隨

大皇帝射獵我等得見者共十六人尚有幾位未出深
宮我等無由瞻仰不得而知阿玉奇汗問

公主幾位我等答曰已經下嫁我等所知者十數位
今宮壺中尚有幾位亦不得而知阿玉奇汗又問聞得
大皇帝每歲避暑行圍所係何地名相去京師幾多遠
近於何時往返我等答曰我

大皇帝避暑之處名熱河及喀喇河屯離都城七八日
路每歲或四月盡或五月初起

駕立秋後哨鹿完日九月間

回鑾阿玉奇汗問此地山川樹木林藪如何我等言此

地在長城邊外有高山大川水極甘美林木茂盛禽獸蕃息阿玉奇汗又問

大皇帝處如何耕種或待雨播種可有水田否我等答曰我中國五穀及各種豆菽無不栽種亦有待雨水播種者亦有水田阿玉奇汗又問

大皇帝龍興之處相隔都城幾多遠近人烟多少我等答曰此處名

盛京自都城行二十餘日可至彼處人烟稠密設立

五部衙門建官管理又安設三將軍彈壓地方阿
玉奇汗問滿洲蒙古大率相類想起初必係同源
如何分而各異之處

大皇帝必已洞鑒煩天使留意回都時可奏知

大皇帝我所遣之人來時將此原由懇乞降

旨明示我等答曰我等留意回日奏

聞阿玉奇汗又問滿洲何以有新舊名色我等答曰

初在

盛京時扈從

太祖皇帝

太宗皇帝人之子孫俱稱舊滿洲其在

盛京邊界地方居住後因我

大皇帝遷居京師者皆係新滿洲阿玉奇汗又問清文

與蒙古字有同異否原係何人創制流傳我等答

曰清文與蒙古字大相懸異我

太祖皇帝始制十二字頭

太宗皇帝於字傍復增圈點並諧音韻於是千變萬化其
用無窮至精至奧阿玉奇汗又問曩時聞得

大皇帝國中有一平西王作亂

大皇帝勦除翦滅係何年叛逆尚有遺孽否我答曰
平西王受我

大皇帝隆恩念其少有微勞封為王爵安置我中國西
南隅雲南地方安享榮華尚不自足竟負恩叛逆
我

大皇帝赫然震怒遣發禁旅勦除剪滅我中國法律此等負國忘恩之人斷不留其種類此係癸丑年倡亂平定以來已四十餘年矣我等向阿玉奇汗言來時奉

大皇帝諭旨欲將貝子阿拉布珠兒遣回與爾完聚若經由策旺拉布坦之路策旺拉布坦與爾不睦他托言伊西邊哈薩克國哈拉哈兒以國邀害阿拉布珠兒亦未可定不便由此路遣回須由俄羅斯

國行走方可安妥特命我等會同國王定議回京
奏

聞再將阿拉布珠兒遣回阿玉奇汗曰其父兄俱在
我一同商酌定議再回覆天使我等又向阿玉奇
汗言我等來已數年幸平安至此已將

諭旨交付國王大事已畢其阿拉布珠兒之事定議後
我等即可起行阿玉奇汗曰諾斷不敢久留天使
其往返迎送阿玉奇汗皆將伊部下併借來俄羅

斯官兵齊集排列放炮作樂越一宿初四日阿玉
奇汗之妃達爾馬巴拉邀請作樂筵宴請二新滿
洲步射莫不稱善初五日阿玉奇汗差伊侍近之
異什來稟稱聞天使內有善射者二人我國王欲
得一觀如不棄請往若倦則已我等言有新滿洲
二人不過能射而已非善射者爾國王欲觀令其
往射於是噶爾圖及米邱二人携

上賜弓矢前往阿玉奇汗邀其近前列坐獻茶果問二

人年庚指盤內歐梨曰中國亦有此果否噶扎爾
圖答曰中國有此果品阿玉奇汗又問更有甚果
品噶扎爾圖言中國果品最多不可勝數阿玉奇
汗又問天使原籍相隔都城幾多遠近噶扎爾圖
言自京師乘馬行三個月內可至阿玉奇汗又問
彼處寒暑雨雪並山川林數若何噶扎爾圖言我
原籍地方夏月不甚炎熱冬月甚寒雨雪不定平
素雪積二三尺許雪大之年有四五尺許深山高

峻險林藪森密溪河甚多內黑龍江牛門河最大
阿玉奇汗又問水之甘苦噶扎爾圖言河水甘美
雖洼處停滌之水亦美無異阿玉奇汗又問河內
出何等魚山中有何等獸噶扎爾圖言河內所產
之魚種類甚多亦有鯉魚大者有一二丈許其索
倫達呼爾人漁捕此魚進貢山內有虎豹熊狼野
豬鹿狍堪達韓等獸阿玉奇汗又問可種田地否
居何廬舍養何牲畜噶扎爾圖言不種田地以打

牡射獵資生無廬舍似爾國遊牧止養馬匹無他
生畜於是樹的射箭阿玉奇汗稱善噶扎爾圖言
我二人並非善射者方隨衆學射耳

大皇帝處執勁弓善射者以萬計阿玉奇汗偕弓詳看
問曰此弓角係牛角否噶扎爾圖言我中國南方
有種水牛此係水牛角阿玉奇汗又問其牛身大
幾許是何顏色噶扎爾圖言我

大皇帝曾差我往南方湖廣地方因此得見此旱牛稍

大其色似駝阿玉奇汗又問

大皇帝所執弓式可得聞否亦射鼓的否中的若何噶
扎爾圖言弓式大約相同俱擇上等佳角樺皮製
造

大皇帝不時射鼓的十中八九阿玉奇汗又問中國漢
人亦射箭否出征所用器械等物曾帶來否噶扎
爾圖言我中國有綠旗兵丁皆漢人駐防各省並
巖疆要地頗多善射者

大皇帝常調取來京令其勤習騎射以勵人材其行兵
所需大砲鳥鎗刀劍長鎗弓箭器械等項甚多我
等此來止携有弓箭別項器械俱未曾帶來阿玉
奇汗取看稱善阿玉奇汗又問天使原籍以外地
方尚有國度否離海洋遠近可曾渡海否噶扎爾
圖言我原籍地方以外有必爾拉國役犬國莫尼
伊爾及鼓魯伊爾諸部落我所不知部落尚多俱
與

大皇帝每歲納貢東海大洋相隔我原籍有一月程沿海一帶曾往射獵不曾過大洋阿玉奇汗又問聞得中國有屬國名朝鮮者與

大皇帝納貢否天使可曾到彼處否噶扎爾圖言朝鮮國係我中國所屬每年

貢進方物我不曾到其地是日原厄魯特國王鄂奇爾圖車臣汗之妻係阿玉奇汗之妹名多爾濟拉布坦邀請作樂筵宴初六日阿玉奇汗之長子沙

克度爾扎布邀請作樂筵宴令其蒙古人相角抵
請二新滿洲射箭衆觀之咸稱善初七日阿玉奇
汗差伊附近番僧阿拉穆占巴並格瓦及薩穆坦
等前來曰我國王差我等來稟天使我國王常欲
遣使恭請

大皇帝萬安心中殷殷因南路不通所以數年相隔奉
曾遣使近日於俄羅斯國假道特遣薩穆坦等前
往請安進貢蒙

大皇帝隆恩重加賞賜不以俄羅斯國道路僻遠復頒諭旨遣天使前來

綸音下降捧讀之餘不勝欣躍中心愛戴今我國王復欲遣使前往其繕寫表章款式我等外夷不通中國禮儀恐不合式或繕寫表章具奏或令使者到日口奏與天使商酌定議而行我等言表奏口奏之處還是國王自行裁酌阿拉穆占巴等又曰天使在薩拉托付地方耽擱情由我國王令我等訴

稟天使聞得天使到俄羅斯國邊界薩拉托付地方信息猶不的確後得實信遂即差魏正等前去迎接從前使者凡自俄羅斯國來者皆係俄羅斯國差人送至我國地方其自我國去者我國即差人送至俄羅斯國交付此番天使來時我以為俄羅斯國仍照前差人送來因此耽誤後又向俄羅斯國借用船隻往返差人往喀山地方去以致遲滯日久我等言此係已往之事今大事既畢畧有

遲延無甚大碍阿拈穆占巴等又稟曰戊寅年阿
拉布珠兒去時我汗曾遣使厄里克格孫前往請
大皇帝萬安進大青馬一匹己卯年到京聞得

大皇帝厚賜恩賞遣還不知何故未到途中被何人謀
害至今無信我等答曰先年曾聞爾國遣使進貢
我等各有所司且年久不知其詳初十日阿玉奇
汗又請于是前往言及阿拉布珠兒之事阿玉奇
汗曰將阿拉布珠兒作何遣回之處

大皇帝自有睿裁南路斷不能來如從俄羅斯國行走
必假道於察罕汗方可若差人往察罕汗處去必
需時日天使必至久待今請天使先回隨後差往
察罕汗去如允我遣使時再行奏

聞阿玉奇汗又問曰達賴喇嘛可遣使往來否我等
答曰達賴喇嘛不時遣使我等來時途中又遇達
賴喇嘛使者阿玉奇汗又曰今道路不通我國人
不能達至西藏凡一切藥物甚是難得我於

大皇帝懇求一切藥物煩天使留意轉為奏

聞我奏表內一並奏請至二位新滿洲天使最善射
幸得快覩亦煩奏

聞我雖係外裔然衣帽服色畧與中國同其俄羅斯
國乃衣冠言語不同之國難以相比天使返旆時
察看俄羅斯國情形凡目擊親見者須當留意奏
知

大皇帝作何區處悉聽

大皇帝睿鑒至遣使往來人數若多恐彼憚煩斷絕道
途我遂無路請

安朝覲進貢矣此等情由煩天使留意奏

聞我恭請

至聖大皇帝萬安我係絕域遠人蒙

大皇帝隆恩感戴不盡但願

至聖大皇帝萬萬歲將我此言亦煩奏

聞十一日阿玉奇汗並伊妃達爾馬巴拉其子沙克

都兒扎布車領敦多布其妹多爾濟拉布坦於我等八人處各送馬一匹外阿玉奇汗又通共送馬七十六匹薰牛皮四百張沙克都爾扎布又送馬七十二匹薰牛皮二百張我等言我等奉

大皇帝欽命前來將

諭旨交付不但爾汗喜悅我等亦喜之不盡勝於諸物多矣我等係遠行人爾國固有預備馬匹供用至俄羅斯國有察罕汗馬匹供用其馬匹皮張並無

所用處今爾汗感激

大皇帝隆恩以我等遠來如此餽送我等若毫不收受
恐或見怪可將送我等乘騎各受一匹其餘馬匹
皮張一槩璧辭但將爾汗餽送之禮奏知

大皇帝可也來使回覆阿玉奇汗又復遣人懇乞曰

大皇帝不棄我汗特遣天使遠來我國並無佳物此馬
匹皮張不過畧表微誠天使雖無可用處可於途
間變價盤費懇乞全收我等言此等餽送物件我

中國從無售鬻之理若收受一二件無異全領於是將阿玉奇汗及達拉穆巴拉沙克都兒扎布車領數多布多爾濟拉布坦所送馬匹各受一騎次日阿玉奇汗以噶扎爾圖米邱善射亦各送馬一匹收受多爾濟拉布坦之女即沙克都爾扎布之妻察罕薩穆送我等馬各一匹曰我父鄂齊爾圖車臣汗在日屢蒙

至聖大皇帝眷愛洪恩近日我母多爾濟坦布坦感

大皇帝從前大德特遣使請安復蒙

大皇帝優加恩賚又念我母舅阿玉奇汗將阿拉布珠
兒殊加恩恤我等不勝感戴天使此來並無可送
之物各送駑馬一匹並非佳物畧表微忱念我父
蒙

大皇帝眷顧之恩幸乞辱留並懇將我情詞轉為奏

聞於是酌議收受其所收馬匹回至薩拉托付地方
俱賞給俄羅斯國通事及護送兵丁訖阿玉奇汗

季子車領教多布奏曰我年童穉恭請

至聖大皇帝萬安進烏鎗一桿烏鎗已交付我使者我
無言可奏但願

如天大皇帝萬萬年臨御天下我在此朝暮於佛前潔
誠禱祝煩天使奏

聞於六月十四日返旆阿玉奇汗遣伊台吉達顏寨
桑爾追圖率兵護送俟渡尼濟兒河辭歸於七月
盡至喀山時金甌薦爽草木未凋沿途山色蒼黃

丹碧霜葉滿林燦若霞綺真一幅畫圖也

土爾扈特國王阿玉奇汗遊牧地方

在俄羅斯國界薩拉托付之東南俱曠野西北
兩面有佛爾格即厄濟兒河環流東面有宰河
環流南有滕紀斯湖厄濟兒河宰河俱向南流
歸入滕紀斯湖沿厄濟兒河俱林木有柞楊樺
叢柳自薩拉托付以至阿玉奇汗所居馬駕托
海地方其間有三道塔爾魯河三道胡班河及

塔爾渾並吳魯蘇屯之小河俱向西流歸入厄

濟兒河其河澤內產黃蓮白蓮蘆葦蒲其厄濟

兒河之西岸自薩拉托付以至滕紀斯湖又有

俄羅斯國屬之西拉客穆什

城名

擦里岑

城名

噶喇

斯諾雅爾

城名

綽爾諾雅爾

城名

阿斯達爾漢諸城

柏興自城池柏興以至馬駑托海地方西南一

帶皆興安山嶺過此向西行百餘里俱係圖里

耶斯科國王空科爾汗所屬和邦即莽武特之

人居住此種人不時擄掠俄羅斯國與土爾扈特兩國邊境人畜詢問阿玉奇汗遊牧地方之大小據言東西可行三十日南北可行二十日

此地產龜蛇

蛇身如黑漆

於十一月初七日回至托波兒地方值總管噶噶林往莫斯科窪城去因等候佳托波兒地方十二月初五日噶噶林到來初七日差伊所屬俄羅斯官拉里宛窪西里委翅人來請於是往見互叙寒

溫噶噶林曰天使途中勞苦凡馬匹供給曾有缺
乏處否似此長途想天使未必走過我等答曰途
中一切供應並無缺乏亦不甚勞苦去歲我等自
厄爾口地方起程來時沿途雖皆有山巒林藪我
等俱舟行不覺自雅板沁地方陸行沿途皆林藪
道路狹隘泥濘處甚多我中國並無此等地方亦
不曾見我中國地方南至南海東之東海西與西
藏之西沙章汗接壤此等地方我國之人皆曾到

過惟沙章汗地方未到在北則有爾國地方我等
初次到此我中國並無似爾國地方者噶噶林又
問天使至薩拉托付地方因何不即往阿玉奇汗
處去乃久住薩拉托付地方又不知在阿玉奇汗
處曾住幾日我等答曰阿玉奇汗在阿斯達爾漢
左近地方居住即欲到彼因雪大難行而阿玉奇
汗迎接之人又未到是以久住候青草發出阿玉
奇汗遊牧至馬騾托海地方遣人迎接始往在阿

玉奇汗地方住十四日噶噶林曰我在三柯忒撒
忒爾布爾和城內曾見察罕汗此城原係忒費耶
忒國地方我察罕征取修葺城池池隨我汗名字
呼為三柯忒撒忒爾布爾和此城修葺勝於莫斯
科窪城我汗現在此城居住今歲我汗與忒費耶
忒國征戰又擄獲船貳十一隻將軍一員兵八百
名現今付蘭楚斯諸國俱相援忒費耶忒國堅守
城池觀此數國之兵人丁强健法度甚嚴每遇敵

必鏖戰每無退縮之意其土爾扈特國之兵並無紀律遇敵交戰望影即放鎗射箭較近但思逃竄並無抗拒捍禦之能倘若倣倖勝敵惟貪取貨物而已十年前我汗曾借土爾扈特一萬萬隨征將土爾扈特三千兵與式費耶忒國兵三百人對敵終不能取勝曩時我國曾與圖里邨斯科國王空科爾汗構兵曾取其阿藻城近日我國遣使往空科爾汗講和永不興師議定還其阿藻城其阿藻

城東北盡入我國矣噶噶林又問曰中國

大皇帝行兵所用器械俱係何項可得聞否我等答曰
我中國所用火器炮銃式樣甚多弓矢刀鎗等項
俱用與敵人交戰度其必中方點大炮較近始放
鎗射箭至鏖戰時俱用刀鎗必以勝敵為尚稍有
退縮者即於陣前梟示雖陣亡之屍法不容失若
有失落定行治罪軍法極其森嚴噶噶林曰我俄
羅斯國從前亦射箭自從現在之汗萑事以來廢

棄二十餘年我等向噶噶林言爾察罕汗春秋幾
何承襲幾年爾國歷有幾汗至今共歷年若干答
曰我汗今年四十一歲歷事二十八年曩時我國
並未稱汗自衣宛窪西里委翅起始稱汗至今歷
二十三代共計三百五十餘載至十三代汗始征
取喀山托波兒阿斯達爾汗等處今已一百六十
年矣我等向噶噶林言我等奉差事竣欲遣人前
往馳奏

大皇帝在薩拉托付喀山黑林諾付三處曾向護從官
博爾果付泥克道及博爾果付泥克云欲先遣人
之事關係重大我不敢當至托波兒地方我總管
自有定奪故不曾令我等前往今總管既到我等
欲即刻遣人前往馳奏

大皇帝噶噶林曰甚是馳奏

大皇帝事屬緊要理應作速前往我察罕汗曾吩咐作
速送天使至中國去不得遲慢大部來文亦有不

可遲滯字樣我等何敢稽遲十七日噶噶林差俄
羅斯官拉里宛窪西里委翅請余同納顏前往相
會噶噶林曰天使初降敝邑我輩或心有不盡禮
有不周處亦未可知望乞天使海涵中國人自古
從未到我國地方今幸遇天使前來我等不勝歡
忭我等答曰往返沿途供應諸項並無缺悞官兵
各小心謹慎我等毫無勞苦皆由總管辦理得當
之所致也再我等向日但耳聞俄羅斯國地方從

朱一到今奉

大皇帝欽命經過爾國地方得遇伊等亦喜之不盡噶
噶林曰我見察罕汗時曾問天使行止我將天使
等皆知識高明曾言汗如欲相會我等即往會之
處告訴我汗又問大部可有印文來否我稟云不
曾有文書我汗言今現有干戈之事在式費耶忒
邊界地方駐扎欲會天使意雖殷篤但無大部文
書所以不敢驚動天使若大部有文書到來我雖

駐扎遠地任有大事必請天使相會矣噶噶林又
向我等曰我差官兵直送天使至京師將此護送
官兵萬望一同偕往不阻邊疆是感我亦移會大
部具文書業付護送官員前往護送官兵到彼時
令其待後遣護送官兵到日同回可也至天使前
往沿途一切馬匹供用等項我皆辦理完備斷不
敢悞十二月二十二日撥給驛馬拖床派出護送
官兵余同納顏各帶跟役二名自托波兒起行越

七宿於二十九日至塔喇斯科地方

塔喇斯科

在托波兒之東南相去一千二百餘里厄爾齊斯河來自東南向西北而流塔喇河來自東南於塔喇斯科相對地方歸入厄爾齊斯河沿途地平坦俱林數有杉松馬尾松楊樺榆叢柳櫻蕓沿厄爾齊斯河岸皆塔塔拉人居住間有田畝厄爾齊斯河之南岸有廬舍居千餘戶俄羅

斯與塔塔拉雜處天主堂六座設管轄柏興頭
目一員駐兵五百名

五十三年正月十二日起程越十四宿於十五
日至托穆斯科地方沿途俱是歸附俄羅斯之塔
搭拉並巴爾巴忒之野人居住此處喀薩克圖哈
拉哈爾八國策旺拉布坦皆與俄羅斯國連界居
人稀少俱食雪

托穆斯科

在塔喇斯科之東南相去二千五百餘里鄂布
河從托穆斯科二百里外來自東南向西北而
流俄羅斯呼為鄂布河其巴爾巴忒人呼為牙
巴里河托穆河來自東南由西面繞過柏興向
西北而流至百里外歸入鄂布河自塔喇斯科
三百里內皆林藪有杉松馬尾松楊樺榆叢柳
櫻蕁俱俄羅斯居住間有田畝從此至鄂布河
沿途地甚平坦惟樺木片片叢生甚稀生蘆荻

處甚多有水澤無溪澗此處塔塔拉與巴爾巴
忒兩種人雜處夏秋則飲澤中及低窪處潦水
冬春則食雪冰俄羅斯哈薩克國哈拉哈兒
國策旺拉布坦四國連界接壤此處所居塔塔
拉並巴爾巴忒人與俄羅斯策旺拉布坦兩國
皆納賦不時被哈薩國人侵奪擄掠自鄂布
河以至托穆斯科沿途皆林藪有杉松馬尾松
楊樺榆叢柳櫻莫俄羅斯與塔塔拉人間有田

敵托穆河東岸有廬舍居千餘戶俄羅斯與塔
塔拉並貨通及克爾紀斯厄魯特各種人雜處
柏興左近地方田畝甚多天主堂十座設管轄
柏興頭目一員駐兵五百名

自托穆斯科往伊聶謝來向東北行其間一千六
百餘里其楚里穆河自麻科佛斯科山內發源向
西南歸入鄂布河沿途俱林藪有杉松馬尾松果
松樺楊叢柳櫻蓂刺玫托穆斯科百里以內有小

柏興四五處俱俄羅斯間有田畝楚里穆河岸
數內皆係塔塔拉人散處甚稀捕灰鼠銀鼠狐狸
納貢伊聶謝二百里以內皆山林有小柏興六七
處俱俄羅斯間有田畝越十五宿至伊聶謝柏興
侯辦驛馬供給止二宿於二月初四日起程又行
十日至伊里穆城

伊里穆城

在伊聶謝之東南相去二千餘里沿途俱山林

有嶺亦由通古斯河舟行陸路亦通伊里穆城
似柏興四面皆山林有杉松馬尾松楊樺叢柳
櫻莫其伊里穆河來自東北環流伊里穆城歸
入通古斯河伊里穆河北岸有廬舍居二百餘
戶俱俄羅斯有天主堂二座設管轄柏興頭目
一員駐兵二百名自伊里穆城往厄爾口城向
東南行其間千有餘里沿途皆山林有嶺亦由
昂噶拉河舟行陸路亦可行

五十四年三月二十七日至京師往

暢春園

陛見將奉差往返諸事面奏

上大悅深加褒獎俯降溫綸頒賜

御膳具奏疏曰為欽奉

上諭事臣等於康熙五十一年五月二十二日自京師

起程於七月二十三日至俄羅斯國邊界楚庫栢

興地方管理栢興之俄羅斯頭目衣宛薩委翅聞

得中國

至聖大皇帝欽差天使即撥官兵船隻迎接至栢興地方

諭旨前排列兵丁數隊導引至公署安歇俄羅斯頭目言兩國和議年久我國人不時前往中國沾

至聖大皇帝深恩天使前來理應即便送往但天使此來業已往報察罕汗回信未至難於起程暫請少待於是臣等往楚庫栢興地方候察罕汗信到五

十二年正月十四日察罕汗文到厄爾口城差俄
羅斯官按疊列衣阿法那西委翅前來迎接問其
來官答曰蒙我頭目差遣命我謹慎款待迎接

至聖大皇帝天使來文我不曾見其中情由不得而知
臣等於正月十二日自楚庫柏興起程途行十日
於本月二十五日至厄爾口城其頭目費多爾衣
宛薩委翅人排兵列幟鳴炮放鎗鼓吹迎接本日
即欲起程費多爾衣宛薩委翅言只令我迎接天

使至此居住待托波兒差官迎接到日方可起程
二月二十日由托波兒特差官博爾果付泥克四
鐵班訥委翅前來臣等即欲起程博爾果付泥克
曰今陸路泥陷難行人烟斷絕馬匹不能繼續我
總管吩咐將天使大人由水路接來於是臣等候
嚕昂嚕拉河水解釋於五月初四日自厄爾口城
起程途行三個月於七月初四日至托波兒地方
嚕嚕林馬提飛費多爾委翅排兵列幟迎接

諭旨前列兵丁數對導引官員護從送至公署安歇
噶鳴林相見即持臣等手恭請

至聖大皇帝萬安畢盛稱兩國和議之後我國人屢蒙
大皇帝隆恩不勝感戴款待極其欽敬至沿途所過城
堡官員迎接亦皆排兵列幟鳴炮放鎗鼓吹不勝
欽奉所至地方縉紳耆老莫不進獻食物瞻仰叩
謁皆向臣等稱頌

至聖大皇帝仁恩

誠德臣等伏以俄羅斯國乃西北遐陬荒裔自古未通
中國史籍所不載中國人民未曾一至其地我

皇上文德覃敷

神威丕顯恢宏八極撫乂萬邦俄羅斯始通中國自未
定邊界之前數十年來深仁厚惠淪浹已久屢洽
以仁德俾沾實惠俄羅斯舉國皆傾心向化噶噶
林不勝欣感遂即撥給船隻增添官兵令作遞送
至阿玉奇汗處謹慎款待一併同回臣等於七月

十二日自托波兜起程逕行四月有餘十一月十六日至俄羅斯土爾扈特兩國交界之薩拉托付地方因雪大暫止其地五十三年四月初五日土爾扈特國阿玉奇汗差部下台吉魏正等迎接至俄羅斯國之薩拉托付地方臣于五月十六日渡厄濟兒河二十日起程沿途經過地方阿玉奇汗部下台吉番僧及投入阿玉奇汗之莽武特頭目各率所屬人等排列室畜迎送筵宴馬前跪獻食

物皆不勝欽敬遂行十日於六月初一日至阿玉
奇汗駐紮之馬駕托海地方阿玉奇汗遣部下番
僧台吉寨桑等迎接導至公署下午阿玉奇汗差
番僧格瓦等前來稟稱明日吉辰恭請

大皇帝諭旨次日臣等捧

旨前往土爾扈特國台吉番僧前導俄羅斯國官兵隨
後擁護至阿玉奇汗帳幄前下馬交付

諭旨阿玉奇汗跪接恭請

東土大皇帝萬安畢作樂筵宴排列部下及俄羅斯國
官兵放炮迎接臣等伏以

皇帝德並乾坤

明同日月山陬海澨俱登衽席之安絕塞窮荒共享平
成之福興滅繼絕濟困扶危凡茲綏輯遠藩

聖恩真同高厚是以土爾扈特國阿玉奇汗聞之不勝
感激竭盡悃誠遣使修

貢

皇上仁恩廣布霈澤周行遣臣等頒發

諭旨並賜恩賞阿玉奇汗愈不禁欣感之至上言臣生

長外國賔遠

天都竊承

皇帝至聖至明德猷宣著傾就日之誠欲覩

天顏而身不能至展朝天之款遣使入覲而道路難通

中心怏怏寤寐不安近日從俄羅斯國察罕汗假

道竭誠遣使請

安以土毛微物虔修進貢復蒙

至聖大皇帝不棄曲加優賜深荷寵耀不以俄羅斯國

僻遠

欽命天使頒發

諭旨舉國增輝山川生色捧讀之餘不勝欣躍五內融

化臣幸屬籍中華得蒙

如天大皇帝恩寵山高海深天覆地載惟願

至聖大皇帝萬萬歲虔誠禱祝而已此外更無他語臣

等在阿玉奇汗地方住十四日筵宴四次餽送馬
匹臣等於六月十四日起程恭惟我

皇上德合天地

道秉中和仁風翔溢乎孩提教澤覃敷於遐邇闡千萬
年聲教未及之疆土服從古法法令不至之人心
神武丕昭而版圖增廓

聖恩遠播而藩服欽崇四海而遙六合以內凡懷德畏
威諸國莫不梯山航海羅拜

彤廷舉合生載氣之倫悉皆納貢獻琛珍來重譯此皆
我

皇上至德浩蕩遠超萬古

神功高邁獨冠百王是以致此邳隆之治極盛之時也
臣等生際昇平幸叨頒賞絕域之鉅典仰賴

至聖大皇帝威福經歷諸國皆以臣等中華天使畏服
欽敬臣等咸獲莫大之榮罔知所措曷勝踴躍欣
忭之至謹具奏疏及沿途山川形勢恭繕黃冊輿

圖進

呈

御覽為此謹

奏請

旨奉

旨知道了該部知道冊圖留覽

奉差前往之時家居年已六十有九往返三載餘
以暨還都蒙

聖恩闔門清泰歡欣團聚夏四月初旬仰感

聖主再造之恩生全之德懇請隨

駕避暑効力前往熱河值征勦逆寇策旺拉布坦有

事之際兵部臣不以余愚蒙庸劣具疏題

請調補兵部員外郎辦理軍務屢次入直

內廷及

陛見奏對咸沐不次之獎諭獲格外之

恩綸又特

肯差往俄羅斯國界二次焉時夏六月因大兵四路進
勦逆寇令余曉諭俄羅斯國特

旨遣往余至楚庫栢興地方遺書於俄羅斯國總管噶
噶林馬提飛其詞曰中華

至聖大皇帝使臣賜內閣侍讀品級圖里琛致書於總
管西畢爾斯科地方噶噶林馬提飛費多爾委翅
別來無恙余奉

大聖皇帝欽命遣往土爾扈特國阿玉奇汗之時經過

爾國地方二載餘沿途供給極其豐裕役馬舟車
並無貽悞至托波兒時爾輸誠竭敬列幟排兵致
迎迓之禮邀請筵宴殫地主之誠及所厯城堡頭
目官員皆排兵迎送甚屬欽敬遣官兵以遠迎至
阿玉奇汗而護送特令衣宛薩委翅率領兵丁送
至京師爾之恭敬恪篤盡禮合儀諸懿行余回都
俱奏

聞

至聖大皇帝謂爾國與厄魯特人迥異秉心誠實係禮
義之邦我

至聖大皇帝深為嘉悅特

勅理藩院其前來護送衣宛薩委翅及官兵抵都時一
切供給皆從優裕復賜

恩賞衣宛薩委翅等俱無恙勿容顧慮務令其安泰而
回今因公務復臨爾境自別後倏忽一載想念殊
深不能面叙特致書存問曩者策旺拉布坦不時

遣使入

覲進貢方物我

大皇帝亦甚加憐恤屢頒

恩賞通使往來已有年矣我

大皇帝至仁性成臨御萬方凡有血氣者皆欲使享昇

平勦滅噶爾丹之後其準噶爾部落人民應屬我

國我

大皇帝明知不納聽其在彼以遂其生計但欲率土人

民各復生全同事雍熙雖洞悉策旺拉布坦勢力
凋敝窮迫已極我

大皇帝不忍征伐拳育至今其策旺拉布坦賦性奸偽
背恩寡信率土之國無不知者蓋其天性使然終
莫能悛即今言之爾國之塔喇斯科及托穆斯科
邊陲地方居住之巴爾巴忒並塔塔拉人等歸附
爾國已久彼猶勒取貢物其已歸爾國之貨通人
等彼復屢次遣使索取又邀奪爾國貿易之人羈

留數月其後得脫往我國之西寧貿易回時不敢
往策旺拉布坦路行走請路于我國乃特遣人送
至楚庫地方至于鹽場屯兵狂悖妄舉諸事其不
道無知昭然可見矣近者策旺拉布坦不自量力
不度其醜類惟灰燼之禍乃敢潛遣賊衆侵我邊
隅回子所居之哈密地方伊所遣二千厄魯特人
為我國二百漢兵數名捆子擊敗三四次鼠竄我
國封疆大使將此事奏

聞我

大皇帝特

旨酌調邊兵并派喀爾喀兵現今聲罪致討如策旺拉
布坦部下有流竄逃亡者令爾邊境之人即行收
納我國並不計取雖經大部移會但兩國和議交
好有年與子得以相識其西畢爾斯科地方事務
俱係爾統轄諸事得以專主我所深知者其收納
策旺拉布坦逃亡之事當深為留意今奉

命之使將我

大皇帝至聖至仁率土生靈咸欲置之衽席斷不與無
名之師不伐無罪之國今不得已聲其罪而遣旅
致討特致書悉焉茲因麟鴻之便用展眷慕之懷
遺幣四端

異域錄卷下